

Nouvo

Newsletter of the Seychelles National Party

Vol. 18 Nimerò 4 (12 Mars 2009)

Vizyon

Ler in arive: SNP i Pare!

Vreman ler in arive pour ki Sesel i annan en sanzman gouvèrnman. Lepep Sesel i ganny demande pou met dekote bann prensip ek bann lide ki'n anmenn sa pei lo son zenou e fer nou pep soufer atraver pri lavi tro ser. Ozordi lepep Seselwa pe ganny demande pou ralye otour bann nouvo lide e otour en parti politik ki annan en plan lo ki mannyer pou fer nou pep viv byen dan en pei kot prosperite i akonpany nou. Pep Seselwa, ralye otour SNP e annou sanz nou pei.

Lekip SNP pe travay

Dan diskour lo leta lanasyon SNP in montre klerman ki nou en parti politik ki pran byen sak Seselwa a-ker. Sak manm ki'n koze in montre ki SNP i ranpli avek lide. Nou'n koz lo amelyorasyon ledikasyon, lekonomi, lapolis, lalwa, lanvironnman, lapes, lagrikiltir, lasante, fer desann pri lavi, pli bon proteksyon nou resours, etc...Sa lekip ki SNP in swazir koman bann portparol, se bann dimoun ki deza pe travay pou war ki mannyer nou pa pou repet menm fot lepase, me plito, ki mannyer Sesel pou fer progres e kontinyen avans devan. SNP pe travay e se pour sa rezon nou pe dir avek ou ozordi ki nou'n pare e ki Sesel i bezwen sanzman anba SNP.

Seselwa i merit en meyer lavenir

Dan SNP, nou kwar ki Sesel i pour nou tou. Sa i en prensip fondamantal e i fer nou travay pour tou dimoun. Letan nou koz lo lavenir nou pei, nou pe dir ki tou Seselwa i merit en meyer lavenir. Tou posibilite pour li debourye i devret a son dispozisyon. Frer ek ser Seselwa, se sa ki pou fer nou pei kapab avanse e fer progres ansanm avek tou Seselwa. I pa ok pour zis en pti group, parey i ete ozordi, pou ganny tou larises pei, tandi ki Seselwa ordiner i kontinyen trimouse san

ki zot kapab fer 2 bout zwenn. SNP i dir ki larises ki sa pei i prodwi i devret ganny byen partaze e sakenn i merit son par ladan.

Swiv en parti ki serye

SNP i prouve ki i en parti politik ki serye, ki kontan Sesel e ki anvi war devlopman nou pei. Ou bezwen zis regard nou rikord e sa i vin evidan. SNP pa'n zanmen servi sabotaz pei koman en mwayen politik. Zanmen nou'n met bonm, dife oubyen detri lenfrastriktir pei. Zanmen nou pou fer en kou deta dan nou pei e servi zarm pou touye oubyen fer disparet nou sitwayen. SNP i serye. I fer propozisyon lo devlopman pei, nou bann

dirizan i met Sesel avan tou, e ansanm nou rod sa ki meyer pour nou pei. Nou kwar ki tou Seselwa i menm grander, e nou kwar ki se dan bwat vote ki en gouvèrnman i ganny sanz. Sa se en parti politik ki kwar dan son pep e ki travay pour **TOU** Seselwa.

SNP i pare pou defann Sesel

Seselwa, dan milye tou zot difikilte, nou anvi dir zot pou pran kouraz. Ouver zot lizye byen gran e konpran ki mannyer SPPF in bat zot latet avek tou kalite promes. SNP pe travay pour ou ganny en meyer demen. Nou'n pare!

Pa zis koz linite: Montre senserite

Sesel i pour tou Seselwa. Linite sa pep i tre enportan pour son progres e son lamars ver en meyer demen. I malere ki pandan sa dernyen 32an, bann dirizan SPPF in diviz sa pep dan tou kalite fason e zot in arive fer sa pep viv dan mefyans. Zot in menm fer distenksyon ant Seselwa. Dapre SPPF, serten i ok e ganny tou privez, tandi ki lezot pa ok. SNP i dir fodre ini sa pep dan senserite ek lonekte.

Lider SNP, Mr. Ramkalawan, in deza fer kler ki i pa santi lilitite pour li asiste sa miting avek Mr. Michel ek Mrs. Potter aköz i deza annan en kantite keksoz ki gouvèrnman i kapab fer pou montre son senserite. Aköz fer miting kot i zis annan zoli parol, me apre napa aksyon ki swiv?

Se dan sa lespri ki Mr. Ramkalawan in fer

kler ki Mr. Michel ek son gouvèrnman i bezwen aret zis zve politik e pas lo aksyon. La en lalis keksoz ki Mr. Michel i kapab fer san okenn miting: Apwent Mr. Mancham koman en Anbasader, retir tou sistenm 'Security clearance', aret ser dimoun, retourn Seselwa kalifye ki'n ganny pouze pour rezon politik dan zot travay, donn tou MNA menm fasilite travay dan distrikt ki'n elekte zot, reviz Public Order Act parey Ziz Reilly ti rekomande, donn Seselwa en bon sistenm elektoral anba en Komisyon olye anba en sel dimoun.

Sa i zis detrwa pti keksoz ki tya montre ki Mr. Michel i senser e onnet letan i koz lo linite Seselwa. SNP ek lepep Seselwa i fatige zis avek parol. Nou anvi aksyon serye aprezan.

Politik bonmarse SPPF in detri Sesel

Dan en manev pou esey anvoy en Koudpye par deryer avek Lopoziyon, Prezidan Michel dan son swadizan ladres lo leta lanasyon in esey fer krwar ki SNP i en parti politik ki pas son letan fer politik bonmarse. Vye granmoun i dir 'poul ki kakay premye, limenm li ki'n ponn !'

Annou vwar enpe bann keksoz ki Mr Michel in dir dan lepase zis pou anbet lepep, zis pou aste vot, zis pou fer promes dan vid e zis pou fer politik bonmarse!

Son pli gran promes eleksyon sete pou konstri 5000 lakaz. 3an plitar Zil Perverance i ankor en lavil nanm. Zis atlet etranze ki'n konnen ki savedir dormi dan lakaz nef ziska prezan. Dimoun i monte desann e vir an ron. Lalis demann dan distrik i kontinyen ogmante. SPPF i kontinyen servi lakaz ek later koman en zouti politik. Lepep i ankor pe atann, sepsyalman tou sa bann dimoun ki Mr. Michel ti dir zot klerman ki si zot non ti lo lalis an 2006, zot pou ganny en lakaz.

Lot gro promes ti vin dan son diskour bidze 2006, kot i ti promet en meyer lavi alavenir pour tou Seselwa. Me la ozordi to lenflasyon n'ariv 63%. Pri komodite nepli abordab pou laplipar fanmiy. Pri lafarin i R14.50 kilo e zonyon ek ponm-de-ter n'ariv R11.75 en kilo. Tand ki dile pti baba mark Nan pe vann R69.50 en bwat 400g. Diri ki Seselwa i manz toulezour in osi ogmante. Pour en fanmiy ki abitye manz 10 kilo, zot pou bezwen trouv R28 anpli zis lo diri.

I ti dir dan kanpanny eleksyon prezidansyel 2006 ki si lopoziyon i ganny pourvwar, nou pou devalye rounpi. Me lekel ki ozordi in

fer nou larzan perdi son valer par plis ki 100%? Ankonsekans, sa ki ti'n met son pti larzan dekote labank pour letan dir, in perdi lanmwatye son seving.

An Oktob 2006, Msye Michel ti dir ki Sesel pa pou bezwen pran 'loan' ankor. Me ki'n arive apres? Sesel in pret en sonm \$308 milyon avek Lehman Brothers, a en to lenterere 24% par an, ki'n efektifman fer nou fayit. Sa pa apel politik bonmarse?

Lekip Jj ti promet pou donn travay Seselwa. Me depi ki in ganny elekte an 2006, Msye Michel in pous Seselwa dan travay 2 fwa. An 2006 pros 100 travayer kalifye ti ganny met deor anba programm restriktirasyon e an 2008, plis ki 2 mil in ganny met lo depar forse. Depi sa, to somaz in sorti 1% an Novanm 2008 pou ariv 3.6%.

Msye Michel in depans plizyer milyon rounpi larzan lepep atraver komisyon rapor ziz Riley. Me 2an apre ki rapor in ganny soumet, SBC p'ankor vin endepandan, Public Order Act i touzour an defo avek Konstitisyon e zofisyse lapolis ki ti bat dirizan Lopoziyon e plizyer son siporter ankor pe zouir zot promosyon.

Kantmenm ozordi i pe pres tenm 'Koste Seselwa,' Msye Michel ankor pe refize mars avek MNA lopoziyon dan distrik. I pe plito donn lord pou tyermenn brans SPPF dan bann distrik fer travay ki MNA elekte i dwatet fer. I kontinyen abiz son privez koman prezidan lo SBC e anpes SNP fer rali politik e anpes annan radyo lib dan Sesel.

Parol en 'leker pour tou Seselwa' in ganny ranplase par en politik diskriminasyon ver lazene. Si ou siport li, i annan loportinite

pour ou ki enkli 'loan' ziska Rs100 mil avek lenterere mwens ki 3%. Me si ou pa siport li, ou ganny bloke. Viktimizasyon atraver sistenm 'Security Clearance' i kontinyen e lavenir i san nouvo loportinite pour bann zenn.

I kler pour tou Seselwa ki ozordi Mr. Michel i kontinyen diriz en pei atraver politik bonmarse. Si i ti vremen senser, i tya komans fer bann aksyon konkret pou ede refer sa pei e donn nou pep sa vre laliberte. I pa senser.

Lapolis i fel

Lapolis Sesel anba direksyon bann Irlande in fel! Lanmor en papa ek son pti zanfan i montre ki mannyer sa pei i fonksyonnen. Si i zanfan en fanmiy ordiner, napa gran keksoz ki ganny fer, me si i zanfan en gran imsyte, tou kalite keksoz i ganny fer. I tris, me nou bezwen dir keksoz parey i ete.

Lepep pe demann kestyon: Akoz ki letan sa manman ti vin kordgard, lapolis pa ti organiz en 'search party' pou al dan Anse Mazor pou rod sa pti piti? Sa manman ti'n donn zot ase lenformasyon. Akoz ki letan trazed i arive ki larme, avek AK47 ek tou kalite gard, enkli bann Irlande ki wa kwar ti pe al piknik, ti monte? Sa pa apel latizann apre lanmor?

Lapolis in fel en fanmiy Seselwa ki ozordi i dan soufrans. Sa kalite keksoz pa kapab kontinyen arive dan nou pei. Nou espere ki lapolis i rekonnet zot tor. Lapolis fodre vin profesyonnel e protez sa pep ek tou resours posib.

PAS PARTOU

Tro gro madanm?!

I vre ki pouvwar ek lotorite i rantre dan serten tre vit. MNA Pointe Larue nepli kapab leve dan Lasanble pou pran son sak. I prefere kriy sekirite pou fer donn li son kaba. Madanm, pa sa travay sekirite dan Lasanble. Bouz ou enpe e ou ava perdi en kilo. Zenes sakouy ou!

Minis lapire, Minis Lanmar

Ki sa boug pe rode? I ti dir nou 'lapire is good for you!'. Apre sa \$4.5milyon dan proze Perseverans in disparet letan i ti minis. I minis lagrikiltir, me selman i pe rod detri

pli gran lafernm koson dan pei. La aprezan i pe netway lanmar! Annou pa bliye ki boug-la i osi en tret politik. Fodre ki sa boug i dir nou klerman ki i pe fer akoz i pe vin en vre lanbara pour tou dimoun. Eski ou pe mazinen ki dimoun pe dir ou ete? En gran donner g....????

Deco dan maryaz!

Zabitan Talbo dan lakaz brile i ankor pe espere, me ki nou tande? Deco in pey plis ki R60,000 pou al maryaz dan lenn. Deco dan langouti, son madanm dan sari nwanr pe enjoy, e apre i vin koz bis dan Lasanble konmsi i vremen enterese! Sa i apel teat!

SNP Lottery

WIN WITH THE SNP !

PRIZES

- 1st : Family holiday : Four return tickets to Mauritius + 7 days accommodation on BB
- 2nd : Two return tickets to Singapore
- 3rd : Two nights HB at La Reserve Hotel, Praslin
- 4th : Two nights BB at L'Archipel Hotel, Praslin
- 5th : SR5000 cash
- 6th : SR5000 cash
- 7th : One washing machine
- 8th : One refrigerator
- 9th : One TV set
- 10th : One DVD player
- 11th : One Guitar
- 12th-20th : Consolation prizes

R10/-

Draw on 1st May 2009